

KE ARAH IKTISAD YANG DIKEHENDAKI ISLAM

“ sekiranya dasar siasah iktisad Islam ini dijalankan, maka kita akan terlepas dari bencana iktisad yang sekarang telah menyakitkan perut dan memusingkan kepala, bahkan penyakit makan suap dan kerosakan akhlak akan hilang lenyap”. Demikian madmun kupasan soal yang sangat besar ertinya ini.

Memang suatu hakikat yang telah disedari ramai bahawa alim ulama itu bertanggungjawab atas perkembangan agama dan atas berjalannya hukum-hukum agama dalam masyarakat dan negara. Bahkan alim ulama bertanggungjawab besar dalam mencari jalan bagi menyelamatkan umat Islam dari ancaman seteru-seteru agama.

Masalahnya

Dasar Islam dalam soal-soal ibadah dan soal-soal lainnya memang sudah jelas, tetapi dasar Islam yang jelas cara-caranya dan tegas pelaksanaannya dalam peraturan hidup iktisad belum lagi ada, belum lagi kita fahami betul-betul, apa lagi dijalankan.

Selagi masyarakat umat Islam kita masih kosong dari suatu peraturan siasah iktisad Islam yang jelas dan tegas, maka tidak dapat kita sesalkan terus menerus peraturan iktisad kaum model yang dinamakan “Iktisad yang lepas bebas”. Si kaya lepas bebas memeras si miskin, dan yang kuat berleluas menindas yang lemah, sedang si kaya dan si kuat itu diperkosa oleh perhambaan harta benda yang telah mempengaruhi jiwa mereka.

Demikian juga, selagi kita umat Islam belum lagi mengemukakan dan menjalankan peraturan hidup iktisad yang jelas dan tegas maka janganlah kita menyesal

sekiranya dasar-dasar hidup yang anti agama mempengaruhi sebahagian dari orang-orang Islam kita.

Komunis tidak akan tersiar di negeri-negeri Islam, sekiranya umat Islam telah mempunyai suatu peraturan hidup iktisad yang jelas dan tegas, bahkan peraturan kaum model sekarang yang telah kelihatan kerosakannya akan hilang lenyap dengan segeranya, dan digantikan oleh peraturan iktisad yang sesuai dengan ajaran Islam.

Dasar Yang Utama

Yang jadi dasar yang utama dalam peraturan iktisad kaum model ialah soal hak milik alat-alat hasil mahsul, iaitu kekayaan diserahkan kepada orang-orang perseorangan. Orang-orang perseorangan bebas mencari, menguasai dan memiliki kekayaan alat-alat dan bahan-bahan hasil mahsul sebanyak yang mereka dapat dan selekas yang mereka sanggup. Itulah sebabnya maka dinamakan peraturan iktisad bebas. Maka terjadilah persaingan, bahkan rebutan yang bebas maka akibatnya segala fakir miskin semakin diperah oleh si kaya, dan orang-orang yang lemah makin tidak berdaya kerana ditindas oleh yang lebih kuat. Akhirnya mereka semua terdorong menjadi hamba harta benda.

Bentuk iktisad Komunis pula menetapkan hak milik, dan kekayaan alat-alat hasil mahsul dikuasai oleh negara atau pemerintah, bukan oleh orang-orang perseorangan. Dengan jalan itu maka kekuasaan pemerintah menjadi berlipat ganda dari keadaan biasa dan kerana itulah terjadi perbuatan kerusi-kerusi pemerintah. Sejarah telah menyatakan bahawa dalam perbuatan yang hebat atau pemberontakan itu maka selalu golongan yang kuat itulah yang menang, dan menguasai segala-galanya bahkan menguasai rakyat jelata. Akibatnya rakyat jelata jatuh dalam perhambaan suatu golongan yang sedang berkuasa. Jadi bentuk masyarakat negaranya tidak ubahnya seperti bentuk piramid, yakni besar di bawahnya iaitu rakyat jelata dan makin ke atas makin kecil, dan di atas sekali duduklah seorang diktatornya.

Jelasnya, kalau bentuk iktisad kaum modal telah menimbulkan perhambaan manusia oleh harta benda, maka bentuk iktisad Komunis menimbulkan perhambaan sepuak manusia terhadap rakyat jelata.

Milik Dan Kerja

Menurut huraian ilmu pengetahuan dan menurut ajaran-ajaran agama kita Islam, maka yang mesti jadi dasar pembakaran bukanlah soal hak milik alat-alat hasil mahsul, kerana telah nyata bahawa alat-alat hasil mahsul itu ialah benda-benda beku, tidak mempunyai kemahuan sendiri, tetapi semua itu dapat diputihkan, dihitamkan, atau diperbagai-bagaikan oleh kecergasan kerja-kerja manusia.

Oleh itu, maka “kerja-kerja manusia” itulah yang harus jadi dasar pemikiran. Kerja-kerja itulah yang sebenarnya menjadi dasar utama. Dalam hal yang utama ini, berpuluh-puluh ayat-ayat Quran yang menganjurkan supaya kita berfikir seperti yang disebutkan itu.

Di antaranya Allah ‘Azzā wa Jallā berfirman:

Wa al-ladhinā amanū wa ‘amalū al-ṣāliḥāt.

Sesudah kata-kata: “*Wa al-ladhinā amanū*” kerap kali Allah ‘Azzā wa Jallā sertakan dengan perkataan “*wa ‘amalū al-ṣāliḥāt*”. Ertinya: “Dan mereka yang beriman dan mengerjakan kerja-kerja yang baik . . .”

Bahkan pernah Allah bersumpah dengan firmannya yang bermaksud:

“Demi masa, sesungguhnya manusia dalam kerugian, kecuali mereka yang beriman dan mengerjakan kerja-kerja yang baik . . .”

Jadi kerja-kerja kitalah yang mesti jadi pokok pemikiran dan jadi dasar pertimbangan.

Lebih jelas lagi, Tuhan berfirman, maksudnya: “Katakanlah - Hai Muḥammad - bekerjalah kamu, Allah dan hasilnya serta orang-orang yang beriman akan melihat (mempertimbang) amal kamu; dan kamu akan dikembalikan kepada (Allah) yang mengetahui akan barang yang tersembunyi dan barang yang

Sambungannya dimuka 35

Dapatkanlah buku-buku untuk menambah pengetahuan

Tuan/ Puan:

- | | |
|------------------------------|--------|
| 1. Risalah Allah | 40 sen |
| 2. Permulaan Agama | 70 “ |
| 3. Perempuan Islam | 30 “ |
| 4. Iman Perempuan | 20 “ |
| 5. Perempuan dan Pilihanraya | 40 “ |
| 6. Taklid | 60 “ |
| 7. Qada’ dan Qadar | 25 “ |
| 8. Berjihad Pada Jalan Allah | 70 “ |

Alamatkanlah kepada:

QALAM

356 & 358, Geylang Road,

segala larangannya, yang besar atau yang kecil.

Dalam menjalankan hukum agama terhadap segala tingkatan, kadi yang bersifat takwa itu, sentiasa ingat akan kemurkaan Allah kalau sekiranya ia berlaku zalim dalam mengenakan hukum itu, dan ia akan merasa berdosa besar kalau ia belum dapat membela si lemah dan penganiayaan si kejam buas, dan tidak pula ia takut dan gentar mengambil hak orang yang teraniaya dari orang yang zalim, kerana tidak ada yang ditakuti olehnya selain Allah.

Takwa yang palsu, ialah yang takut melanggar larangan manusia, tetapi tidak takut melanggar larangan Allah.

3. Kadi yang mengerti hukum Islam

Adapun sifat kadi yang ketiga, ialah mengerti betul-betul akan hukum-hukum Islam, bukan mengerti kulitnya sahaja, sedang isi, maksud dan tujuannya tidak diketahui. Dengan pengertian yang betul-betul terhadap agama, dapatlah seseorang meletakkan hukum pada tempatnya, dan tidak khuatir akan berlaku kesalahan dan kerosakan.

Kadi-kadi dalam zaman Saidina ‘Umar, dipilih dari orang-orang yang ahli betul tentang agama, iaitu yang luas pengetahuannya tentang Quran dan hadis. bukan hanya terhenti kepada mengetahui perkara nikah, takak dan rujuk.

Tiga sifat itulah yang menjadi punca yang mustahak memilih seorang kadi yang berkelayakkan. Dengan tiga sifat itulah kadi-kadi pada zaman Saidina ‘Umar menjalankan hukum-hukum Islam dengan sempurna, adil, dan rakyat merasa berpuas hati.

(Pati buah kalam “al-Khaṭāṭ” dalam “al-Lisān”).

Kearah Iktisad yang Dikehendaki Islam

Sambungan dari muka 22

nyata, lalu ia akan terangkan kepada kamu apa yang kamu sudah kerjakan.”

Siasah Iktisad

-Nyatalah bahawa kerja-kerja kita manusialah yang mesti menjadi dasar pokok siasah iktisad. Jadi bukanlah soal hak milik kekayaan sebagaimana dasar kapitalism dan komunilism, tetapi kerja-kerja kita manusia yang semestinya menjadi pokok pertimbangan.

Cara-cara menjalankan siasah iktisad Islam itu ialah sebagaimana yang pernah dianjurkan oleh Doktor Mohamad Hatta kepada pemerintah Indonesia, supaya pemerintah mendirikan “Pertubuhan Penjualan Pemerintah”. Doktor Hatta menegaskan supaya pemerintah Indonesia membuang siasah iktisad biasa, yang kacau sekarang; dan mencadangkan supaya “ekonomi terpimpin” seperti itulah yang mesti dijalankan oleh pemerintah. Bukan “demokrasi terpimpin”.

Saya percaya, sekiranya dasar siasah iktisad Islam ini dijalankan maka kita akan terlepas dari bencana iktisad yang sekarang telah menyakitkan perut dan memusingkan kepala. Bahkan penyakit makan suap dan kerosakan akhlak akan hilang lenyap.

(Demikian buah fikiran Doktor Haji Kaharudin Yunus yang dikemukannya dalam muktamar ulama seluruh Indonesia yang telah bersidang di Palembang baharu-baharu ini).